

## **2015-imut Inatsisartut aningaasanut inatsisigallagassaata allannguutissaatut siunnersuut.**

Aallaqqaasiullugu Partii Naleqqamiit nunatta aningaasaqarnerata ilorraap tungaanut saatinneqarnissaanut suliniuteqarfigineqartariaqartut ilaat makku tikkuarusuppavut, pingaartumik suliffissaaleqinerujussuaq qaangerniarlugu aamma immikkut iliuuseqaqqittoqarnissaa Partii Naleqqamiit ajortorparput, tassami upernaq 174 mio kr-nit aningaasaliissutigineqartut ilaqqinneqarnissaalluunniit siunnersuummi matumani eqqaaneqanngimmat.

Isumaqarpungut suliffissaaleqineq akiorniarlugu ataasiaannartumik aningaasaliisimaneq tuppallersaatitut isigisariaqanngikkipput, kisiannili ataavartussamik pilersaaruserluakkamillu iliuuseqartoqartariaqartoq.

Tassunga atatillugu Partii Naleqqamiit Naalakkersuisunut piumasarissuarput;

174 mio kr-inik aningaasaliisimaneq pillugu inatsisartut suliap killiffianik allakkatigut ilisimatinneqartariaqartut, aningaasat kommuninut qanoq agguataarneqarsimappat ? suliffiit qassit pilersinneqarpat ? ataavartumik suliffiusinnaasunik pilersitsisoqarsimavaa ?

Partii Naleqqamiit isumaqarpugut inuussutissarsiutitigut suliniutinik nutaaliortoqartariaqartoq

.

Taamaammat-una Partii Naleqqamiit aamma qineqqusaarnermi assut pingaartillugu oqariartuutigiuaripput, pissutsinik allannguinnissaq pisariaqarluinnartoq.

Soorlu aalisarnerup aamma piniarnerup iluani allannguinnissat, aalisartut, piniartut, peqatigiiffii, Kattuffii, Pinngortitaleriffik allallu soqutigisallit qanimut suleqatigalugit allannguisoqartariaqartoq.

Suliffissaqartitsiniarneq suliffissaaleqinerlu aamma annertuumik aningaasaqarnikkut ajornartorsiortitsipput. Tamakkulu qaangerneqassappata ilaatigut aaqqissuussaannikkut allannguinnissat avaqqunneqarsinnaanngillat, soorlu assersuutigalugu, sulisartut ilinniagaqarsimangitsut nunanit allaneersut amerlasuut immikkut piumasaqaatetaqanngitsumik maanga nunatsinnut suliaortortittarpavut, naak maani nunaqavissut suliffissaqanngitsut amerlasoorparujussuungaluartut.

Taamaammat Partii Naleqqamiit piumasaraarput, avataaniit sulisussarsiortarnermut inatsit allanngortinneqartariaqartoq, taamaaliornikkut maani nunaqqatitta suliffissaqarnikkut qulakkeerunneqarnissaat aamma piviusunngortinneqassammat.

Kiisalu aamma Naalakkersuisunut Partii Naleqqamiit kaammattuutigissuvarput, qujanartumik maani inuit eqiingasut ilaasa suliniarluarnerisigut aqumiut peqatigiiffeqalernerisigut, maani nunaqavissut aalisariutini avataasiutini assigisaannilu aqumiut tamakkiinerusumik inuttaasalernissaannut piumasaqaatinik naammassinnittarnissaat anguniarlugu immikkut taakku pikkorissartinneqarnissaannut aningaasaliisoqartalernissaa sulissutigeqqullugu.

Ukioq mannamut avaleraasartuunik aalisartitsinermi 22.000 tons pisarineqanngitsoornerannut pissutsit suut pissutaanersut Partii Naleqqamiit paaserusupparput, tassami tusakkavut naapertorlugit maani nunaqavissut avaleraasartoorniarnermi peqataarusullutik qinnuteqarsimasut naammassimangaluarmata, taamaattorlu akuerineqarsimanatik. Pissutsit taamaattut Partii Naleqqamiit assut akueriuminaatsippavut.

Taamaammallu nassuiaasoqarnissaa piumasaraarput.

Nunaqarfiit ilaanni tunitsiviit matoqqapput, sarullippassuit aalisakkallu allat aalisarneqarsinnaangaluartut.

Sooruna tamakku aallartissinnaanerinit immikkut aningaasaliisoqanngitsoq ?

Aamma ilumoornersoq paaserusupparput; maani allaffissuarmi pisortat pisinnaatitaanersut inissiamik illumilluunniit imminut atugassamik ullormut 4.000,- missaanik akilimmik attartorsinnaanermut, malungalugu ullormut 4.000,- kr-inik akilimmik ?

Partii Naleraq sinnerlugu taamatut naatsumik oqaareerluta 2015-imut inatsisartut aningaasanut inatsisigigallagassaata allannguutissaatut siunnersuut imannak oqaaseqarfigissuarput;

Isumaqarpugut allaffissornikkut kalaallit nunatsinnut naapertuuttumik aamma ingerlatsinermit aningaasartuutik killisaataasinnaasut tamaasa ilanngullugit nalilersorluarneqarlutik allanngortinneqartariaqartut.

Iluvorsinnaanngilaq inuiaqatigiit taama ikitsigaluta ineqarnikkut selskabenik assigiinngitsunik (A/S INI, Illuut A/S, Iserit il.il.) tamarmik immikkut ingerlatsinermit qularnanngitsumik inuiaqatigiit akiligaannik akisoorujussuarmik ingerlatsisut akilersuinnassallugit.

Iluvorsinnaanngilaq inissiarpassuit atornerqaratik uninngaannartut isiginnaaginnassallugit. Tamakku ingerlannerat atuisut allat akilersorpaat.

Tamakuinnaanngillat inuiaqatigiinnut ulluinnarni ingerlatsinermit akiligassanngortinneqartartut.

Taamaattumik ingerlatsinermit aamma inuiaqatigiinnut akikinnerpaaq anguniarlugu allannguinnissaq Partii Naleqqamiit ujartorparput piumasaralugulu.

Taavalu Pituffimmut tunngatillugu Partii Naleqqamiit paaserusupparput; Naalakkersuisut Pituffiup Nunatsinnut suliffeqarnikkut, ilinniartoqarnikkut aammalu akileraartarnikkut iluaqutigineqarnerunissaa anguniarlugu qanoq iliuuseqarniarnersut ?

Taavarlu sanaartornermut tunngatillugu, soorunami Partii Naleqqamiit pingaartipparput sanaartornermi suliat ingerlareersut kinguarsarneqaratik ingerlanneqarnissaat, taamaammat sulianut assigiinngitsunut aningaasat immikkoortinneqarsimasut, taakkununggalu ilassutissat Partii Naleqqamiit annerusumik oqaaseqarfiginngikkaluarlugit ilalerpagut, kisianni piumasaralugu suliat ataasiakkaat pilersaarusiortuarnep iluani, suliaq sunaangaluartorluunniit kingusinnerusukkut immikkut aningaasaliiffigineqarsinnaaneranut tunngasut sapinngisamik pinngitsoortinniarlugit qulakkeerinnittoqartarnissaa eqqumaffigineqartariaqartoq.

Aamma siunnersuummi konto pingaarnermi 84 40 16 KNR-ip illutassaanut nutaamut tunngatillugu Partii Naleqqamiit paaserusupparput aningaasaliissutit 30 mio-nik qaffasinnerulersimanerat qanoq nassuiaatissartaqarnersoq ?

Kiisalu konto pingaarneq 87 11 09 – assartuineq pillugu Isumalioqatigiissitap misissueqqaarneriunut soq 5 mio kr-inik aningaasaliissutit ilasariaqalersimanersut aamma ilanngullugu nassuiaqquvarput.

Naggataatigut Partii Naleqqamiit assut paaserusupparput aamma erseqqissarneqaquvarput, Naalakkersuisut kommuninut ataatsimoortumik tapiissutit pillugit piginnaatitsissummik qinnuteqarnerannut atatillugu, piginnaatitsissutit suut imarissanerai aamma aningaasatigut killissarititaasut qanoq ittut eqqarsaatigineqarnersut erseqqissarneqartariaqartut.

Taamatut piumasaqarnitsinnut pissutitaavoq, naluneqanngitsutut 2015-imut aningaasanut inatsisissatut siunnersuut qinersineq manna sioqqullugu suliarineqarmat, taamanikkulli kommunit akornanni kommunit akileraartarnikkut nalingiissaarinnermut tunngasut kommunit akornerminni aamma kommunit Naalakkersuisuut akornanni isumaqatigiinnginnerit imaannaanngitsut pilernikummata.

Aamma tassunga ilanngullugu kommuneqarfiit kattuffianiit allagaq 10. December 2014-imi ullulerneqarsimasoq Partii Naleqqamiit innersuukkusupparput, tassani aamma takusinnaangatsigu kommunit mannamut akileraarutitigut 2015-imi nalingiissaarinissamut tunngasut pillugit aqqiagiinngissuteqartut, tassani kommunerqarfik Sermersooq Kanukoka-p isumaqatigiissutaanut kisiartaalluni akerliummat.

Taamaammat Aningaasaqarnermut Aatsitassasiortermullu Naalakkersuisup Kanukoka-ip inassuteqaataanut qanoq isumaqarnersoq aamma Partii Naleqqamiit paaserusupparput.

Taama naatsumik Partii Naleqqamiit oqaaseqarluta suliaq aappassaaneraneqannginnerani apeqqutitta akissuteqarfigineqarnissaat piumasaraarput.